

Testo base di riferimento: R. H. Rodgers, 1975

Cura dell'edizione digitale: F. Boldrer, 2024

Inserimento e controllo dei dati: L. Di Simone, 2024

Permalink: <https://www.mqdq.it/texts/PALLAD|insi|001> Copia

Pasiphile, ornatus fidei, cui iure fatemur,

Si quid in arcano pectoris umbra tegit,

Bis septem paruos, opus agricolare, libellos

Quos manus haec scripsit parte silente pedum,

5 Nec strictos numeris nec Apollinis amne fluentes

Sed pura tantum rusticitate rudes,

Commendas, dignaris, amas et *uilia dicta*

Adfectu socii sollicitante colis.

Nunc ideo modicum crescens fiducia carmen

10 Obtulit arbitrio laetificanda tuo.

Est nostrae studium non condemnabile Musae

Vrbanum fari rusticitatis opus:

Sub thalami specie felices iungere siluas,

Vt suboli mixtus crescat utrimque decor,

15 Connexumque nemus uestire adfinibus umbris

Et gemina partum nobilitare coma,

Foederibus blandis dulces confundere sucos

Et laetum *duplici* fruge saporis ali.

Quae quibus hospitium praestent uirgulta docebo,

20 Quae sit adoptiuus arbor onusta comis.

Ipse poli rector, quo lucida sidera currunt,

Quo fixa est tellus, quo fluit unda maris,

Cum posset mixtos ramis inducere flores

Et uaria grauidum pingere fronde nemus,

25 Dignatus nostros hoc insignire labores,

Naturam fieri sanxit ab arte nouam.

Non segne officium nostrae reor esse Camenae

Aut operis parui gratia fiet inops.

Si uelocis equae pigro miscetur asello

30 Ardor, ut in sterilem res cadat acta gradum

Fecundumque genus productus delet heres

Et sibi defectum copia prolis agat,

Cur non arbor inops pinguescat ab hospite gemma

Et *decus* externi floris adepta micet?

35 Incipiam: quicquid ueteres scripsere coloni

Sacraque priscorum uerba labore sequar.

Principio multas species industria sollers

Protulit et doctam iussit inire manum,

Nam quaecumque uirens alienis frondibus arbor

40 Comitur, his discit credita ferre modis:

Aut noua discreto figuntur germina libro

Aut aliud *sumunt robora* fissa *caput*

Aut uirides oculos externi gemma tumoris

Accipit et lento stringitur uda sinu.

45 Primus Echionii palmes se iungere *Bacchi* 📄

Nouit et externo tenditur uua mero.

Nexilibus gemmis fecundos implicat artus

Vitis et amplexum pascit adulta genus

Degenerisque comae uestigia mitis inumbrat

50 Pampinus et pingui curuat onusta deo.

Robora Palladii *decorant* siluestria rami, 📄

Nobilitat partus baca superba feros,

Fecundat sterilis pingues oleaster oliuas

Et quae non nouit munera ferre docet.

55 Germine cana pirus niueos haud inuida flores 📄

Commodat et uarium nectit amore nemus.

Nunc rapit hirsutis horrenda sororibus arma

Et docet indomitas ponere tela piros,

Nunc teretem pingui producit acumine malum

60 Fraxineasque nouo flectit honore manus.

Phyllida quin etiam grandi mitescere fructu

Instituens durae dat sua membra cuti,

Et steriles spinos et inertem fetibus ornum

Dotat et ignotum cogit amare decus.

65 Huius et inmissi uertere *cydonea* rami

Pomaque confusus blanda creauit odor.

Castanae septos aspro uelamine fetus


Exuit et placido pondere mutat onus

Mespilae exarmat pugnacibus horrida membris

70 Et mala tranquillo cortice uota premit.

Creditur *in* Libycis sua germina nectere ramis


Laetaque Puniceo posse decore frui.

Punica non alios umquam dignata sapes 

Mala nec externis adsociata comis

75 Ipsa suas augent mutato semine gemmas

Et sibi cognato picta rubore placent.

Insita proceris pergit concreescere ramis 

Et sociam mutat malus amica pirum

Seque feros siluis hortatur linquere mores

80 Et partu gaudet nobiliore frui.

Spiniferas prunos armataque robora sentes

Leuigat et pulchris uestit adulta comis.

Exiguam sorbum dulci distendere suco

Nouit et ad cupidas flectere poma manus.

85 Stipitibus gaudet nomen mutare salignis

Et gratum Nymphis spargere flore nemus.

Robora thyrsigero platani concordia Baccho

Fetibus instituit plena *rubere* nouis.

Illius insolitas miratur persicus umbras

90 Populeaeque ferunt candida dona comae.

Mespilus huic paret lapidosaque uiscera mutans

Tenditur et niueo plena liquore rubet.

Pro sudibus fetis et pro praegnantibus armis


Castanae fuluum dant noua mala decus.

95 Ipsa suos onerat meliori germine ramos 


Persicus et pruno scit sociare genus


Inponitque leues in stipite Phyllidis umbras

Et tali discit fortior esse gradu.

Cum praestet cunctis se fulua cydonea pomis, 


100 Alterius nullo creditur hospitio;
Roboris externi librum aspernata superbit,
Scit tantum nullo crescere posse decus
Sed propriis pandens cognata cubilia ramis
Stat contenta suum nobilitare bonum.


105 *Semina* dura piri despecti mala saporis 
Mespilus admisso germine tuta subit
Et geminis sese uiolentior inserit armis
Atque auidas *terret robore* saeua manus.

Nec non et citrei patiuntur mutua rami 

110 Pignora quae grauido cortice morus alit,
Pomaque *pasturi* blando redolentia suco
Armatis mutant spicula nota piris.


Pruna suis addunt felicia germina membris 

115 Exarmat fetus sed brachia roboris armat
Castanae prunus iussa tenere larem.
Adsuescunt siliquae uiridi mollescere suco 
Et gremio pascunt *cerea* poma suo.

Persuadet moris taetrum *uariare* colorem 

120 Ficus et inuasis dat sua iura comis.
Se quoque miratur pingui grandescere suco
Et solitum gaudet uincere poma modum.
Insignes foliis platanos, felicia mensis
Brachia, gaudentes uitis honore comas

125 Ingrediens pingui se cortice maxima ficus
Seruat et optatos inplet adepta sinus.

Mutua quin etiam moris commercia ficus 

Praestat et oblatum robore germen alit.
Fraxinus huic auidae confert sua membra *sodali*

130 Et metuit fetus sparsa cruore nouos.
Proceras fagos et poma hirsuta uirentis
Castanae duris aspera mala comis
Inficiens monstrat piceo nigrescere partu,

Et suco pascit turgida poma nouo.

135 Obsequitur moris blando terebinthus odore
Et geminis ueniunt munera mixta bonis.

Sorba suos partus merito maioris honestant 📖

Seminis et pulchro curua labore nitent.

Haec arbos spinae duros mucronibus artus

140 Exuit ac libris mitibus arma tegit,
Aureaque adnexo miscere *cydonea* fetu
Gaudet et externi dona coloris amat.

Inseritur lauro cerasus partuque coacto 📖

Tinguit adoptiuus uirginis ora pudor.

145 Umbrantes platanos et iniquam robore prunum
Compellit gemmis pingere membra suis
Populeasque nouo distinguit munere frondes,
Sic blandus spargit brachia cana rubor.

Phyllis odoratos primaueis floribus artus 📖

150 *Discisso* pruni cortice fixa *tegit*
Pomaeque permutat uelamine persica mixto
Duritiemque docet tegminis esse loco.
In modicam tornat siliqua tendente figuram
Et frondes pulchro ditat odore feras

155 Castaneamque trucem depulsis cogit echinis
Mirari fructus leuia poma sui.

Quin et amygdaleos subeunt pistacia ramos 📖

Et *meritum* maius de breuitate petunt.

Haec et cognato cingens terebinthus amictu

160 Nutrit adoptiuus nobilitanda comis.

Flumineam salicem fecundant ardua membra 📖

Castaneae et multo pasta liquore uigent.

Arbuteas frondes uastae nucis occupat umbra 📖

Pomaeque sub duplici cortice tuta refert.

165 Cetera quae sollers processu temporis usus

Exprimet exemplis instituere nouis.

Haec sat erit *tenuem* uersu memorasse poetam

Quem iuuat effossi terga mouere soli.

Carmina tu duros inter formata bidentes

170 Aspera sed miti rusticitate leges.

x

x

x


Scansione eseguita da PEDECERTO © 2011 — www.pedecerto.eu

?

Esporta



UNIVERSITÀ
CA' FOSCARI
VENEZIA



UNIVERSITÀ
DELLA
CALABRIA



UNIVERSITÀ
DI NAPOLI
FEDERICO II



UNIVERSITÀ
DEGLI STUDI
DI PARMA



UNIVERSITÀ
DEGLI STUDI
DI PERUGIA

PRIN 2005 - PRIN 2007

Copyright © 2007 — Musisque Deoque. Tutti i diritti riservati

Ultimo aggiornamento: 2024.01.27

contatti: mqdq-galaxy@unive.it

[Cookie policy](#)

I glifi dei pulsanti sono realizzati con [Glyphicons](#)



Copyright © 2007 — Musisque Deoque

Tutti i diritti riservati

*Tutti i diritti dei testi con apparato contenuti in www.mqdq.it sono riservati alle unità del Progetto Ricerca di Interesse Nazionale **Musisque Deoque**, ai curatori editoriali dell'opera e agli autori originari dei documenti.*

Non ne è consentito alcun uso a scopi commerciali se non previo accordo. Sono consentite la riproduzione e la circolazione in formato cartaceo o su supporto elettronico portatile (off-line) ad esclusivo uso scientifico, didattico o documentario, purché i documenti non vengano alterati in alcun modo sostanziale, ed in particolare mantengano le corrette indicazioni di data, paternità e fonte originale (citazione).

Link da altri siti web sono graditi, soprattutto se ne verrà data comunicazione alla redazione (info@lutessa.it), per facilitare la tempestiva comunicazione di eventuali successive variazioni.

È vietato ogni genere di mirroring (duplicazione) su altri siti, o di cattura automatica dei testi, a meno di specifici accordi con la redazione.